

欽定剿平粵匪方略

欽定勦平粵匪方略卷五十八 癸丑年

九月初六日

戊申

正藍旗漢軍都統勝保奏言據

探逆匪擾及順德境界西凌阿明慶魁福蘊秀
等業已追及賊現盤踞臨沼關一帶臣與善祿
等晝夜兼行以冀速保正定並嚴催各路之兵
每日限行百里同赴賊竄處所會勦俟抵正定
後各路兵齊當激勵將士迅速妥籌勦辦誓必

滅盡此賊而後已一面飛催署直隸提督保恆
帶兵由固關速回正定扼截所有保定撤回山
西之兵儘數截留暫防正定俟臣一到再當酌
量分撥並恐其由廣平大名而東擾及東昌天
津一帶已飛咨山東撫臣帶兵扼截東竄一面
飛飭天津鎮帶兵卽於西南扼要堵剿天津人
素强悍團練可以協助兵力應請

皇上嚴飭山東直隸各督撫妥籌辦理奏入

上諭曰已屢次有寄諭催汝前進汝雖轉折紆遠行走
尙速或可繞出賊前恩華托明阿仍應嚴催現賊已
竄至趙州正定無兵焦急之至專賴汝趕到也續探
由順德東竄或卽是此股抑係分股著探明具奏天
下安危關係甚重我君臣誓必懷承

天命殲滅此賊餘無復言

勝保又奏言盤獲奸細供稱賊由洪洞探路欲
至山東東昌及天津一帶查天津風俗强悍人
性喜鬪尋常街市立有火會凡遇救火之時但
一鳴鑼萬人立聚皆能奮不顧身若密飭該道
府先爲團集喻以大義發給器械等件逆賊一
至齊力抵殺臣等追兵繼至前後夾擊或可一
鼓殲除但該逆剽疾異常必須速辦爲要

同日慶祺奏言天津地面拱衛京畿當此賊氛
四竄之時不可不嚴加防範本處官兵所存無
幾團練義勇一千六百名均係紳董及地方文
員督辦臣體察地方文武情形似有不能融洽
之處若非有人統屬則事權不能歸一查長蘆
鹽政文謙辦事認真應請

皇上飭下該鹽政兼辦防堵事宜抑或另

簡大員來津之處出自

聖裁均奏入

上命軍機大臣傳諭勝保曰逆賊行蹤趨急現已擾及
趙州我軍果能繞出賊前迎勦當不致任其北竄該
大臣所稱探聞賊由順德東竄之說已諭知崇恩嚴
防東昌臨清濱河一帶並諭長蘆鹽政文謙督同天
津鎮道實力巡防慶祺統帶盛京官兵已由天津水

路起程其原坐船隻亦令於到省後暫留停泊儻天津有警卽可折回截剿其由東而北河閒一路由西而北易州一路均須密爲布置昨所派出之八旗精兵及京營兵二千五百名察哈爾兵二千名並慶祺所帶盛京官兵尅日均赴保定會齊保定扼東西之衝兩面皆可兼顧該大臣探明賊蹤所向應調往何路飛速調撥或前進迎擊或東西兩路堵截並迅卽

知照桂良一體籌辦該大臣等帶兵或遏賊前或躡賊後總須前後夾擊盡殲醜類現在恩華所帶之兵該大臣卽嚴催前進如恩華不能親督迎剿其帶兵各員孰爲勇往卽著指名調取令其帶兵飛速前赴大營以備調遣不可遷就拘泥訥爾經額現奏續調到盛京兵及收集潰兵二千名交經文岱統帶跟追訥爾經額復同文冲帶後到兵一千名均在何處署

提督保恆所帶兵五百名蔭秀伊綿阿留紮固關兵一千名並前調赴保定之吉林兵一千名是否趕到並著該大臣迅速催調擇要調撥以資防剿仍確探賊情隨時奏報以慰廑念

上又命軍機大臣傳諭慶祺曰逆匪自竄踞臨洺關以後連陷柏鄉隆平二縣現復竄至趙州勢甚剽疾勝保日內可抵正定迎頭截剿該侍郎統帶各起官兵

由水路行走務須催趨前進斷勿延緩並著知照勝保以備調撥並據勝保片奏盤獲奸細有分股東竄之說若由衛河直達天津亦不可不豫爲防備已諭知勝保桂良隨時偵探卽知照該侍郎相機籌度著於行抵保定後仍將載兵船隻暫留水次設津門有警卽可統領原帶之兵順流下駛爲前後夾擊之計毋失事機

上又命軍機大臣傳諭崇恩曰本日據勝保奏拏獲奸細供稱賊由洪洞探路欲至山東東昌一帶等語現在瑞昌帶兵駐紮濮州兵力尙單勝保現由固關一路出山直抵正定遏賊北竄之路該逆被勦窮蹙難保不紛竄東省著崇恩派委鎮道大員於東昌德州臨清等處實力籌防盤緝奸宄並著該署撫扼要駐紮以資策應勿誤事機

上又命軍機大臣傳諭文謙曰天津爲畿東保衛現值逆氛未靖一切防守關繫緊要必須事權歸一方足以資彈壓長蘆鹽政文謙係朕特簡之員所有地方防堵事宜卽責成文謙會同鎮道大員妥爲籌辦並隨時督率文武員弁及紳民練勇等實力巡防總以嚴緝奸匪鎮定人心爲要又據勝保片奏天津街市立有火會凡遇救火之時鳴鑼立聚萬人若發給器

械等件可以齊力殺賊等語著該鹽政等體察情形飭屬團集務須曉以大義俾知互相守衛卽所以自保身家慶祺現已統兵起程本日復密諭該侍郎於行抵保定後暫將兵船收集儻逆匪有東竄天津之信卽可仍統原帶之兵順流下駛會合夾擊該鹽政等務卽相機布置勿稍疏虞

同日阿彥達奏言查賊情狡詐往往乘閒旁竄

避實擊虛保定省會現有重兵防堵未必徑行
北竄若由西而北則易州一帶較爲喫重該處
有總兵駐紮自當早經布置若由東而北則固
安迤南天津迤西總路要隘尤不可不豫爲防
備可否請

旨派員帶兵馳往文安任邱一帶扼要嚴防與保定爲
犄角之勢以遏逆賊旁竄似更周密奏入

上命軍機大臣傳諭桂良曰據副都統阿彥達奏賊由西而北則易州一帶較爲喫重由東而北則固安迤南天津迤西總路要隘尤不可不豫爲防備所奏不爲無見現在京旗各營及察哈爾官兵俱於保定會齊如賊匪竄過正定則易州情形緊急必須扼要嚴防勝保此時可抵正定如已繞出賊前扼住滹沱正定要隘該逆被勦勢必東竄則河閒天津兩路均極

緊要著桂良隨時確探該逆由何路紛竄卽迅速知照達洪阿培成等趕向截擊總宜與勝保前後夾攻俾腹背受敵方可殲除淨盡昨令慶祺帶領盛京官兵前往保定如探知賊匪窺伺天津卽知照慶祺將原帶之兵折回剿辦至前調往保定之吉林兵一千名現在駐紮何處總無確報訥爾經額現奏續調到盛京等處官兵並收集潰兵共二千名交經文岱帶

往追剿後到官兵一千名由訥爾經額同文冲統帶
現在會否前進均著查明飛催調撥應用

同日訥爾經額奏言探得逆匪竄至臨洛關外
當卽督兵截擊雖斬獲百數十名無如賊衆兵
單難以抵禦八月二十八日賊踞臨洛同知周
憲曾被害逆衆到處放火肆行搶掠又復北竄
查臨洛關北至正定並無險要可扼現在陸續

調到

盛京等處官兵並收集臨洺關接仗潰散之兵共
二千名臣先派總兵經文岱管帶躡後追擊其
後到兵尙有一千餘名臣卽同文沖親帶接續
前進前准勝保來咨賊由東路全數潛逃派副
都統西凌阿帶領馬隊尾追迄今未見趕到惟
懇

天恩速派精兵前赴正定一帶截剿以期速殄羣醜並
請

飭催勝保星速督兵赴援以固畿疆奏入

上諭曰真可謂辜恩溺職之至汝久任畿疆所籌何事
經文岱未必真能得力汝同文冲續帶之兵亦不過
遠遠觀望希飾前非朕若待汝奏到不知誤多少緊
要機宜現已將汝革職矣

初七日己酉桂良奏言據探賊匪竄擾趙州後踞

住大石橋擾及橐城縣提督保恆於初四日帶
兵入正定城聞勝保帶兵四千名亦於初四日
行抵獲鹿當卽飛咨該大臣星速進剿查賊匪
現竄橐城必由滹沱北渡此河除正定所屬外
可渡之處尙多深淺不一已飛札署提督保恆
就近偵探無論賊由何處渡河迅卽派兵堵截

陸續截回大同官兵並本城存兵及保恆所帶之兵計二千餘名均令署提督臨時相機調用至龍王廟停泊之

盛京官兵並吉林官兵俱已飛催前進副都統佟鑑帶出京營礮位業經到齊擬暫留六位存省備用其餘十位運赴前途以資迎擊訥爾經額現駐永年遵卽飛咨將所帶官兵速來省城聽

候撥調藩司張集馨前經訥爾經額奏請在黃河北岸之蘭儀渡等處防守查該員帶有宣化兵五百名督標兵五百名現已飛調該員遵

旨來省協防至河閒府現有兵一千餘名亦飛札天津鎮道轉飭嚴防惟慶祺所帶官兵至今尙無信息現復飛催迅速前來以資防守奏入

上諭曰勝保由獲鹿東行未聞西凌阿等追抵何處料

逆匪不北渡滹沱卽東竄河間保定防守最關緊要
探勝保有獲勝信息速速具奏

同日孫瑞珍奏言賊匪北竄滹沱河爲所必經
河水長落不常淺則可以徒涉深則必須舟渡
今秋雨澤頻仍水勢必大該處渡船無多若撤
收淨盡則逆匪斷難飛越且此河偏近正定南
界果能嚴防無失則勝保大兵不日卽到正可

迎頭截擊直扼其前防勦更易爲力請

旨飭下督臣桂良速飭沿河該管地方文武員弁將滹
沱河渡船一概撤收牽置北岸之上若情形緊
急恐該逆浮河搶船卽鑿沈焚燬應令相機妥
辦以嚴保障而固畿疆

同日許乃普奏言查正定以北無險可扼惟正
定以南之滹沱河爲趙州至正定必由之地欲

守正定必先守滹沱然逆匪詭詐見我兵扼其
要路必由滹沱以南與滹沱相通之沙河新河
據船而下亦可徑渡滹沱應再於東鹿縣所屬
沙河新河及滹沱之對岸分設兵礮一見賊船
卽行轟擊則賊雖有船亦不能渡應請

飭下督臣桂良酌量迅辦均奏入

上命軍機大臣傳諭桂良曰賊匪擾及臺城該處至正

定惟恃漚沱河阻隔前經疊諭該督飭屬收集船隻
以防偷渡茲復據孫瑞珍許乃普奏亦以急收漚沱
並沙河新河船隻爲要著該督嚴飭該地方文武員
弁趕緊將沿河船隻概行撤收其餘小河口並飭一
律照辦晝夜巡查盤詰奸宄毋任匪黨乘閒偷渡該
逆被剿若不敢北渡漚沱勢恐東竄河閒天津等處
著隨時與勝保知照調撥各兵併力兜剿至省城重

地尤宜嚴加防守勿稍大意

上又命軍機大臣傳諭崇恩曰現在勝保已由獲鹿馳赴正定西凌阿維祿由臨洺關一路跟蹤追擊慶祺帶盛京兵二千名由天津馳赴保定復派培成多爾濟那木凱帶領察哈爾官兵並達洪阿等帶領京兵卽日進剿逆匪東竄勢甚剽疾山東與直隸毗連必須嚴密設防臨清德州一帶運河水路直達天津必

須將船隻收集萬不可令該匪奪船北竄該署撫現
赴東昌一帶卽著體察情形扼要防剿毋誤事機瑞
昌帶盛京兵一千名駐紮濮州如該處情形較緩卽
可酌量咨調毋稍拘執

同日訥爾經額奏言賊匪於八月二十八日竄
至沙河知縣玉衡因賊衆難禦以至被戕現在
賊撲任縣總兵經文岱當可追及臣又派副都

統維祿帶兵接應適西凌阿帶領馬隊翻山而
來於三十日行抵臨洺關當卽催令星馳前進
會同經文岱維祿合力剿洗查在後之

盛京官兵尙有一千餘名現已飛札嚴提日內可
到卽由臣統帶跟蹤前進惟查任縣與唐山柏
鄉等處接壤該逆如由柏鄉趙州欒城正定大
路北竄中有滹沱河之隔且署提臣保恆亦由

固關趕到當可堵遏儻由唐山深州安平博野
小路直撲保定並無險要可扼相應請

旨催令現駐

南苑之察哈爾兵四千名馳赴保定駐紮並請

飭撥精兵速赴保定探明賊蹤迎頭堵剿臣督飭維祿

西凌阿保恆經文岱等合力夾擊以期迅掃逆

氛

訥爾經額又奏言直隸支應官兵糧餉一切籌款維艱司庫搜羅殆盡前據署山西按察使郭用賓稟稱山西藩庫存上年奏銷正雜銀及本年上忙銀通計約有二百萬各屬又捐輸銀三十餘萬等語是晉省藩庫甚爲充裕合無仰懇

天恩飭下該省迅速動撥銀四十萬兩以十萬兩解臣

大營以三十萬兩解交直隸藩司收存以備陸
續支放奏入

上命軍機大臣傳諭勝保曰本日據訥爾經額奏該逆
如由柏鄉趙州欒城正定大路北竄中有滹沱河之
隔儻由唐山深州安平博野小路直撲保定並無險
要可守請派兵迎頭堵截等語現在西渡阿帶領勇
隊於三十日行抵臨洺關會同經文岱維祿由南路

跟蹤追勦已有旨諭令西凌阿將誦爾經額所帶之盛京官兵一併管帶迅速前進托明阿明慶等追賊之兵尙未知行抵何處仍卽飛催前進朕思該大臣帶兵出獲鹿山口由西北一路迎頭截勦西凌阿跟蹤追擊賊匪被我軍前後夾攻勢必東竄或直撲山東由運河搶船窺伺天津或徑竄河間一帶乘虛奔突現在達洪阿培成多爾濟那木凱等帶領京兵及

察哈爾馬隊官兵由京前赴保定如該大臣在正定
勦賊業經得手則此項官兵即可飛飭沿途令其直
赴河間一帶迎勦如此三面兜截使賊匪奔喘不暇
當可一鼓殲除保恆所帶官兵五百名現已趕到正
定蘊秀伊綿阿留紮固關兵一千名並前調赴保定
之吉林兵一千名究竟現在何處均著飛催前進佟
鑑所帶礮位應否運赴大營卽著與桂良酌度調用

其滹沱河上下游及沙河新河等處船隻著勝保飛飭各地方文武收集勿令竄匪偷渡並將近日擊賊情形飛速奏報以慰廑念

上又命軍機大臣傳諭西凌阿曰逆匪竄至橐城勢甚剽疾勝保現由獲鹿馳至正定扼賊北竄之路訥爾經額並副都統維祿總兵經文岱所帶官兵及在後之盛京官兵一千餘名均著交西凌阿酌量調遣飛

遠緊躡賊蹤痛加勦洗並隨時知照勝保桂良務使
聲勢聯絡以期四面兜圍托明阿明慶等追賊現抵
何處未據奏報並著飛催前進儻賊匪被我兵前後
夾擊欲圖東竄卽著相機截擊該都統等追賊業已
落後若再不兼程前進但事尾追自問當得何罪懍
之

上又命軍機大臣傳諭郭夢齡曰現在逆匪竄入直境

各路大兵雲集不難指日蕩平惟直隸藩庫無款可籌著該署撫查明無論何款速撥銀三四十萬兩解交直隸藩庫以資軍餉

同日

上諭內閣曰著派惠親王總理巡防事宜會同前派巡防王大臣等妥籌辦理

同日軍機大臣刑部會奏言臣等前奉

諭旨以楊文定應得罪名交臣等審擬具奏遵卽會同
研訊楊文定惟有戰慄恐懼伏地捶頭並稱因
留金陵掣肘是以赴鎮辦防委非因事勢緊迫
卽欲出城亦非別有意見惟鎮江失守未能迅
速克復實屬毫無布置大負

皇上委用深恩祇求從重治罪等語應卽按律擬結查
楊文定奉

旨前往江甯辦理防堵宜如何嚴密布置力固疆圉乃
因陸建瀛自九江退回輒以鎮江爲蘇省門戶
移往防堵追賊匪竄至鎮郡又不能嬰城固守
旋至失陷復退至江陰數月之久毫無布置實
屬罪無可逭楊文定應照守邊將帥被賊圍攻
城寨不行固守而輒棄去因而失陷城寨者斬
監候律擬斬監候秋後處決仍恭候

欽定奏入

上諭內閣曰軍機大臣會同刑部奏定擬楊文定罪名
楊文定著卽照祁寯藻等所擬按律定爲斬監候秋
後處決

初八日庚戌勝保奏言臣於平定途次探得逆賊

已由趙州樂城直犯正定獲鹿一帶距該府縣
僅三四十里臣所帶之兵連日兼程未能到齊

與善祿先帶已到官兵將及二千名星馳行走
二百餘里於初五日抵獲鹿縣知該逆盤踞附
近獲鹿之鎮頭村欲奪此要害使我聲息不通
正擬督兵取道擊殺孰意該逆向橐城東竄查
橐城距正定東南數十里恐由滹沱河偷渡且
恐由趙北口潛犯河間天津一帶臣卽日擬到
正定嚴催各路之兵前進如偵探該逆仍在橐

城卽當飛速進剿儻賊順河東竄臣隨時酌度
或督率官兵分道追擊或卽由正定渡河而東
庶可保護保定河閒一帶一面飛催恩華兵到
斟酌留防欒城兵若干名以扼其回竄西北之
路並作正定前路聲應其餘兵丁令其趕赴臣
營隨剿並派西凌阿等及西安馬隊儘數尾追
又恐賊竄擾東昌則山東及徐州喫重臣已咨

商慧成與山東各路熟籌妥辦以便相機圍擊
奏入

上命軍機大臣傳諭勝保曰勝保甫出獲鹿山口該逆
已聞風東竄擾及直隸勢甚剽疾如不犯保定卽恐
由趙北口竄入河閒天津等處現在察哈爾官兵及
京營官兵雖陸續起程猶恐緩不濟急該大臣宜帶
兵星速繞出賊前迎頭截擊總以保衛畿疆爲要西

凌阿維祿經文岱等現由臨洺一路追剿前來卽著
飛催應於何路截剿相機調度慶祺所帶盛京兵二
千名由水路前進計已行抵保定並著酌量調撥恩
華業經革職拏問其所帶馬步官兵卽著勝保嚴催
統帶各員迅速前進儻仍遲延觀望卽著指名叅奏
懲辦

同日桂良奏言賊匪竄至定州之李青果村距

省城百十餘里恐其繞道竄越查河閒景州一帶爲直省東南要隘必當先期準備已飭該處文武員弁設法堵禦俾賊無去路易於兜撿至省城內外臣已嚴密布置妥爲護守並一面勤加偵探隨時奏

同日泰甯鎮總兵德春奏言自懷慶解圍餘匪

西竄紫荊廣昌一帶均宜鎮靜巡防倍加嚴肅
查紫荊迤西之浮圖峪道通廣昌爲入關咽喉
要路而廣昌爲紫荊門戶其西南一帶之驛馬
嶺斜山峪龍門村獨山城狼牙口並有樵徑數
處均係直達山西又東南面之玉河溝與倒馬
關相通至浮圖峪距關七十里該處形勢外險
內平惟兵力甚單現經督臣撥回原調兵三百

名除將前調之實昌白石插箭三處兵四十七
名撤歸原營分布巡查其餘兵二百五十三名
暫撥浮圖峪總隘據險防守仍飛咨督臣等籌
派大員統帶重兵遡赴紫荊廣昌分屯駐守

同日誚爾經額奏言據知府高午遊擊姜國仲
稟稱順德郡城存兵不及百名復招募鄉勇數
百名製備軍火器械嚴密守禦因南關市集房

屋旣多且皆堅固儻爲賊踞攻勦不易當令經
歷梁炳照署千總張挹蘭帶同兵勇及城關士
民在南關外要隘村莊掘地藏礮堆積石柴暗
伏兩旁相機而動高午等率邢臺縣知縣暨營
弁教佐督士民分段守陴八月二十八日探得
沙河失守三更時分南望火光知賊將到卽將
城上鎧火掩藏旋見火光如晝約六七百人擁

至南門城下正欲爬城城上卽懸鎗拋石槍礮
並發該逆稍卻維時經歷梁炳照署千總張招
蘭所伏之處見大隊賊過卽點燃地礮該逆進
退無路向東北逃竄梁炳照等追至東汪村地
方擊斃逆匪一百餘人天明偵探賊已全股竄
赴任縣查該知府等於逆匪未至之先旣能設
備嚴整迨該逆攻撲之際復能設計擊退稍挫

賊鋒危城克保辦理悉協機宜順德府知府高
午等擬請

恩施以昭激勸均奏入

上命軍機大臣傳諭桂良曰桂良奏賊匪竄至定州嚴
守保定覽奏焦急之至又據勝保奏賊由臺城東竄
已派西凌阿等及西安馬隊儘數尾追等語似於賊
至定州尙未探悉保定爲畿輔屏障最關緊要該督

務卽督率文武員弁實力巡防認真堵禦斷不可令
該逆竄越勝保若能繞至賊前自可會同進剿其河
間一路亦須防其竄入不可疏忽至易州一帶據德
春奏防守浮圖峪係屬後路此時賊從前路奔竄著
該督酌量緩急有可撥兵協濟之處卽著分撥援應
慶祺已於初三日由天津起程計日可抵保定京兵
雖已陸續啟行仍恐緩不濟急該督仍當統籌全局

相機布置賊情剽疾僞越過保定直犯河閒或至天津俱當隨時調度一面知照勝保飛飭帶兵大員攔截逆蹤北竄訥爾經額奏八月二十八日賊撲順德府南門經該府知府高午會同遊擊姜國仲督率兵勇將賊擊退經歷梁炳照署千總張搃蘭在城外設伏殺賊百餘人籲請恩施著該督查明如果該員等擊賊出力卽著奏請獎勵

上又命軍機大臣傳諭舒興阿曰逆賊由橐城東竄關
入定州界內直境情形極爲緊要該督卽統帶官兵
前進迅赴直隸保定一帶相機協剿

上又命軍機大臣傳諭毓書曰連日據桂良等奏賊匪
北竄擾及定州一帶現當防剿喫緊之際著毓書再
行挑撥熱河官兵數百名並熱河哨內駐紮東三盟
官兵三千名飭令總管那敷德卽日管帶起程來京

所有前調哨內牧放之錫林郭勒馬三千匹卽速催
趨前來再古北口提標兵丁如有可以調撥之處卽
著該都統飭知該營員挑選精銳數百名派委得力
將弁帶領來京以備調用

上諭內閣曰已革大學士直隸總督訥爾經額於臨洺
關遇賊竄出山口卽退守廣平毫無籌策現在逆匪
紛竄畿疆勝保已由獲鹿繞至正定一帶而該革督

本日奏報仍在廣平株守畿輔重地較之他省更關緊要該革督貽誤事機厥罪尤重訥爾經額著卽拏問由桂良派員押解來京交刑部按律治罪

上又諭內閣曰理藩院尙書恩華經朕特派帶兵剿賊並令幫辦軍務乃自懷慶解圍逆匪潰竄該尙書帶兵尾追並未與賊一遇經欽差大臣勝保屢次咨催仍復任意遷延辜恩溺職大負委任恩華著卽革職

集賢堂卷三十一
三十一
拏問由勝保派員押解來京交刑部會同宗人府審訊按律治罪恩華所帶官兵卽交勝保統帶飛催前進如有不遵調遣者卽著以軍法從事

同日奕經奏言准慧成來咨該督已奏明暫留揚州先派副都統常清帶青州兵八百五十名前往扼堵並請

旨飭令臣往援廬州復據李嘉端來咨以賊匪在安慶

城外添築土城意欲占踞已飛調各路兵勇前往勦辦其關山一帶需兵防守咨會臣帶兵前往各等語查皖省情形現在雖防逆匪竄入而徐州地方爲江皖東豫四省接壤適中重地三省糧臺皆先後奉

旨安設於此臣於五月間奉

命帶兵專駐防護嗣值豐工漫口尤恐土匪乘機竊發

臣若據慧成咨赴廬州或據李嘉端咨赴關山則徐州別無重兵該處糧臺及各路援應更覺單弱又疊據六合縣稟報賊匪連次攻撲該縣之斷要東溝等處揚城賊匪復窮蹙思竄若由儀徵六合竄過天長則直入淮河已繞出關山之後是徐州爲賊匪北竄之衝萬不可無兵扼守且臨淮河當三面卽關山有警臨淮之兵亦

可就近應援臣現飛調派駐碭山之西安馬隊
兵五百名趕卽前赴臨淮駐紮仍聽候

諭旨或臣暫留徐州或另派大員來徐接替俾徐州中
路扼要有人可以交卸前往不致顧此失彼臣
仍一面酌看情形何處緊急再行相機援守不
敢稍涉大意奏入

上命軍機大臣傳諭奕經曰徐州爲南北適中之地現

在安設各路糧臺又值豐工漫口恐土匪乘機竊發
奕經著仍駐紮徐州以資彈壓逆匪現踞安慶揚城
賊匪又窮蹙思竄如該逆欲圖北擾務當扼要迎擊
不可稍涉大意仍隨時察看皖省情形與李嘉端慧
成等聲息相通互爲援應軍情變幻靡常亦不可拘
泥株守

欽定勦平粵匪方略卷五十九 癸丑年

九月初九日 辛亥 勝保奏言 臣前因逆賊乘夜東

竄步隊追趕不及派都統西凌阿魁福等督帶

黑龍江馬隊六百餘名西安馬隊一百餘名跟

蹤尾追 臣卽繞道直趨賊前兜勦初六日行抵

正定偵知賊竄藁城不遠當卽派兵前往追襲

不期已與西凌阿等所帶馬隊會合該都統等

自八月十八日由洪洞奉令追剿沿途追擊斃
賊多名因逆賊行走太速不能抄擊大股及至
長子縣一帶與副都統明慶會遇知托明阿腦
受傷不及追趕將步隊交明慶管帶因會同
先行尾追趕至臨洛關與賊接仗生擒十餘名
殺斃數十名一路州縣隨到隨失逆賊亦未停
頓直至欒城整齊各隊連夜進兵於初四日卯

刻前敵追及逆賊大股知其分路欲竄獲鹿正
定又因我兵西來復合股東竄棗城適追至距
城二十里之宜陽鎮逆賊全股約萬餘人官兵
奮勇一齊衝殺將賊隊截斷賊匪敗走官兵追
殺三十餘里沿途擊殺長髮賊五六百名半長
髮賊五百餘名逃散裹脅百姓二千餘名內有
坐轎賊目二名經佐領格綢額侍衛索布多爾

扎布先後斬獲奪得軍械多件贏馬不計其數
並獲二百斤至五百斤大礮二十一尊生擒逆
賊百餘名正法追至橐城縣城已失守賊股數
千名出城迎撲我兵奮勇擊殺又斃賊數十名
賊入城中匿避不出官兵撤隊紮營並經附近
村民陸續拏獲奔散餘賊分別正法查逆賊系
突狼奔官兵未能堵禦以致長驅直入擾近畿

疆經臣原派西凌阿魁福並會合明慶等追殺業已大獲勝仗頓挫兇鋒惟探知該逆已由橐城搭橋渡至溥沱河北岸盤踞村莊意圖乘閒東竄我軍步隊僅臣及善祿所帶將及二千名馬隊亦僅西凌阿明慶魁福等所帶千名其由河南撥來之總兵經文岱帶兵於初五日起到擬卽先行齊隊前進扼其北竄之路相機兜剿

並飛催培成多爾濟那木凱由深澤無極一帶
進兵達洪阿由定州阜城驛一路進兵飛咨慶
祺維祿令其帶兵速赴河間扼截東竄天津之
路且作保定椅角之勢西凌阿等卽令由南坨
勦不令回竄惟東南一路俟日內續有兵到方
能分撥協勦至前調恩華所帶馬隊五百名令
其先往無極縣以南扼要駐紮臣步隊兵丁亦

卽前進

同日桂良奏言據報賊匪竄至橐城之郝莊復由郝莊東竄深澤一帶查深澤地方由安平饒陽東竄卽抵河間若往西北行走仍可竄至省城賊情詭譎不可不防除飭各該州縣速爲準備外現在分咨達洪阿培成等迅卽催兵酌量前進並查該處水路由深州可通豫河直至天

津現已移咨慶祺相機進止又查盜陽河一帶
界連冀州獻縣等處亦通天津爲鹽船聚集之
所恐該匪窺伺當卽札委知縣張寶鏐前往收
集船隻防其偷渡至易州紫荆關地居緊要擬
俟京兵到後酌量緩急分撥駐守或俟前調駐
省之吉林兵一千名到齊卽令該管將領統率
前往惟查此項官兵現在龍王廟水路停泊節

經委員迎提尙無確報惟有再行札催以期迅速均奏入

上命軍機大臣傳諭勝保曰逆賊自竄直境所過州縣並未堵禦以致餘匪肆意奔突經此次痛剿自必愈形窮蹙惟該逆旣已渡河而北昨又據桂良奏報賊蹤擾及定州距保定僅百數十里恐南路進剿之兵又成尾追之勢本日特命惠親王爲奉命大將軍並

命僧格林沁爲參贊大臣統帶健銳營兵五百名外
火器營兵五百名兩翼前鋒營八旗護軍營兵二千
名巡捕五營兵五百名察哈爾兵一千名卽日出京
與該大臣前後夾擊所有前次派出培成等所帶各
官兵皆係同時陸續起程該大臣所稱催令分赴深
澤無極及阜城驛等處進剿之處猶恐緩不濟急著
卽先將催到之兵扼要布置仍飛咨僧格林沁分撥

進勦慶祺所帶之盛京兵已由水路起程卽前赴河
間扼截此時西凌阿等由南撓勦卽可兼防東竄之
路該大臣再能迅速北趨不難勦滅勿因命將出師
稍有延待總期同心戮力迅殄妖氛論功行賞朕惟
以勦賊之遲速爲權衡也本日又據桂良奏水路由
深州可通豫河直至天津現已移咨慶祺相機進止
又盜陽河一帶界連冀州獻縣等處亦通天津爲鹽

船聚集之所等語著該大臣酌籌妥防其訥爾經額
原帶之兵現歸西凌阿管帶能否調撥東南一帶卽
著酌量辦理

同日

上諭內閣曰逆賊潰竄山西復由臨洛北竄正定一帶
畿疆近地豈容逆匪肆行前命培成多爾濟那木凱
達洪阿等統帶旗營官兵並察哈爾官兵出京進剿

必須親近重臣總統諸軍以伸天討惠親王綿愉仁
勇忠誠威德克濟著授爲奉命大將軍御前大臣科
爾沁郡王僧格林沁公忠體國謀勇兼資著授爲參
贊大臣本日朕御乾清宮親頒大將軍印參贊大臣
關防並頒給銳捷刀交惠親王祇領訥庫尼素光刀
交僧格林沁祇領卽日統領健銳營外火器營兩翼
前鋒營八旗護軍營巡捕五營及察哈爾各官兵並

哲里木卓索圖昭烏達東三盟蒙古諸王等勁旅由
京前往合勦與欽差大臣勝保等前後夾擊天戈所
指自可剋日蕩平王等其勦力同心嚴明賞罰迅奏
膚公以副委任

上又諭內閣曰僧格林沁現在統兵出京著添派親王
銜定郡王載銓內大臣璧昌辦理巡防事宜

同日山西巡撫恆春奏言 臣前奉

諭旨命臣暫駐正定俟勝保到後奏明赴晉維時臣先於初四日到晉境與勝保會遇已將神雀刀交勝保祗領是日勝保可到直境正定有勝保布置續到兵勇通計八九千名不惟足保正定迎擊逆匪兵力亦不爲單但賊匪一經攻勦儻有潰敗非奔往東南卽仍竄山西臣接印後已派署遊擊陳永祥馳赴遼州幫辦防堵現在山西

各路存兵若干臣尙不知確數擬先就近入省
與藩司郭夢齡悉心籌畫分布調度惟畿疆緊
要賊已擾及隆平柏鄉臣應回正定應在山西
伏祈

皇上飭下遵行奏入

上諭曰昨已有旨令汝勿庸折回汝回省籌商亦是但
不可株守省城以圖自衛

初十日壬子桂良奏言據探賊由深澤一帶擾至

深州如該逆由深州北竄則保定亟須嚴守現
已妥爲布置慎密設防若由深州東竄則河間
天津等處均關緊要雖經飛咨慶祺相機進止
第水路迂緩恐一時未能折回現擬令副都統
佟鑑督兵由張登博野安平一帶星夜抄出賊
前馳抵河間迅圖堵剿聞恩華已抵正定隨帶

礮位尙多所有佟鑑管帶礮位毋庸運往卽酌
分四尊交佟鑑帶至河間妥爲設備如與賊相
值卽便迎頭截擊以期迅速得力奏入

上命軍機大臣傳諭勝保桂良曰賊匪知大兵自西北
兜圍折向東南竄突河間天津甚關緊要僧格林沁
等所帶勁兵趕到自應先就現到之兵扼要布置慶
祺若折回天津固嫌水程迂緩令其嚴扼河間正可

迎頭截擊但盛京官兵宜於陸戰必須舍舟登岸方能得力慶祺究係文員祇宜督率調度仍須曾經出隊武職大員管帶接仗著勝保迅卽酌派一二員飛速前往恩華所帶礮位儘可留用所有佟鑑帶赴保定之礮准其分攜前往河間一帶此時漶沱以南儘已無賊西凌阿必已由橐城北渡該處由束鹿東馳相距深州甚近佟鑑由安平進兵去深州亦祇數十

里必能前後夾擊維祿所帶盛京兵尙在南路卽由
南宮冀州一帶扼其東南賊更無從紛竄至天津一
路兵力終覺單薄著勝保妥籌布置如佟鑑西凌阿
均能追及賊蹤河間扼守已嚴或令慶祺折回或另
撥兵協助卽飛咨辦理兵貴神速不可專待京兵是
爲至要

上又命軍機大臣傳諭文謙曰現在西北一路集有重

兵恐該逆乘虛東竄天津一郡爲水陸要隘屏障畿東尤關緊要衛河一水可達所有沿河要隘亟應嚴密堵禦文謙現辦防守事宜著卽督同鎮道各員及紳商士民等迅速妥籌布置該處團練諒已辦有成效務須時加激勸俾可協助兵力該鹽政等卽察看何路喫緊卽於何路設防要口渡船亦應設法收集偏僻汊港實力巡查並隨時飛探賊情嚴拏奸細如

有難民人等應資遣者卽行遣令回籍如有匪徒假扮冒充卽行嚴拏懲辦務須曉諭地方鎮靜彈壓勿致驚擾

上又命軍機大臣傳諭恆春郭夢齡曰現在直隸大兵雲集所需軍餉著恆春與藩司郭夢齡迅速籌撥銀三十萬兩委員兼程解赴保定以資接濟

同日

上諭內閣曰著添派恭親王奕訢辦理巡防事宜

同日琦善陳金綬雷以誠慧成和濟奏言連日
攻城接仗斃賊多名城內望援甚切時遣奸細
出城探信其江甯鎮江瓜州之賊亦時遣賊黨
薙髮改裝來揚偵探臣琦善等逐日派兵躡獲
逆匪訊問內有僞監軍一名僞師帥二名其餘
百長司馬多係賊之死黨訊明正法總兵武慶

防守浦口於八月二十三日拏獲賊船一隻賊
匪四名現在江面賊匪沿江肆擾臣琦善已飭
北岸各營官兵一體嚴防

琦善陳金綬雷以誠慧成福濟又奏言臣琦善
接據總兵武慶稟稱八月二十九日夜間大雨
如注三十日子刻謀報浦口江岸寶塔根地方
有賊船百餘隻陸續駛至該總兵卽帶遊擊王

巨孝等會同副都統開隆阿等督兵迎擊該匪
見有官兵卽開放槍礮該總兵等督令官兵用
槍礮連環攻擊並施放火箭將賊船焚燒斃匪
無算奪獲刀矛旗幟多件並獲賊船七隻生擒
賊匪六人研訊獲賊供稱由江甯渡至北岸乘
雨撲營欲圖北竄若浦口防兵嚴密卽由和州
烏江一帶北竄隨將該匪悉行正法查湖北安

徽及江甯北岸均屬沿江 臣所派官兵僅止浦
口六合儀徵三處尙虞單弱實在無兵可分現
在嚴催青州馬隊馳往烏江駐紮以資防堵並
飛咨周天爵呂賢基李嘉端加意防範奏入

上命軍機大臣傳諭琦善陳金綬雷以誠慧成福濟曰
揚城逆匪數已無多兩月以來疊據該大臣等奏報
不過待其縋城而出始圖轟擊並未見併力進攻而

安徽廬巢一帶危急萬分逆賊以揚城餘黨牽掣大
兵琦善等頓兵城下久而不克若皖省賊匪肆擾則
揚城各路之兵必致腹背受敵更難措手現在北竄
之賊並無後援尙且重煩兵力若再聽其擾及皖省
全股北竄該大臣等自問當得何罪揚城餘匪勢極
窮蹙著卽併力進攻迅圖克復一面分派得力員弁
帶領兵勇援救安徽毋稍延緩

同日李嘉端奏言粵賊三擾安慶登岸踞城經
臣分撥兵勇赴集賢關堵剿並激勵將士嚴守
待援探知賊在城中添造刀矛驅婦女老弱出
城修築迎江寺圍牆礮臺遣船分往上下游搶
掠據呂賢基函稱自六安赴霍山聞安慶之警
卽折由舒城至桐城整頓團練以爲官兵聲援
其時恆興等所帶兵勇陸續亦到臣又派主事

邊葆淳帶練勇二百名馳往張熙宇營幫辦乃
安慶尙未開仗據含山縣孔繼黃稟稱有賊船
數百隻由金陵駛至和州之鍼魚嘴恐其上岸
分竄遂各帶勇至和含交界之張公橋堵禦並
由署臬司張印塘派辛本梅帶勇接應正在起
程鍼魚嘴之賊船已竄裕溪至三汊河乃改派
辛本梅赴黃落河無爲州一帶會同李登洲由

芙蓉嶺分勇協勦又據玉山王正誼函稱初二日巳刻賊船六七百隻直上運漕當派黃元吉督勇迎勦擊沈賊船一隻斃賊數十人力戰十二三刻賊復大至不能不退回東關李登洲等在黃落河亦未得手仍回芙蓉嶺辛本梅等尙未趕到賊離東關甚近等情臣惟有督令玉山張印塘等嚴飭文武極力守禦一面飛催各路

援兵合力夾擊前聞江西有尾追兵勇迄今未
得的音湖北礮船聞亦造成多隻屢經催調亦
復杳然江南艇船現亦不知作何布置應再請
旨速飭上下游水陸並進毋分畛域全皖幸甚

李嘉端又奏言據李登洲稟報初二日賊船聞
入黃落河當卽督勇開放槍礮斃賊三百餘人
適以鉛藥用盡且賊數衆多力難抵禦退守芙

蓉嶺壯勇死傷二百餘人又李鴻章暨張印塘
函稱初三日有賊船千餘隻擁進東關經玉山
王正誼派富惠辛本梅黃元吉各帶兵勇力禦
衆寡不敵東關失守臣查賊勢猖獗若入巢湖
卽可直抵廬郡現已飛調恆興帶兵趕緊折回
號召附近團練以爲守禦之計並咨會呂賢基
在桐邀集團練扼守南路奏入

上命軍機大臣傳諭周天爵李嘉端呂賢基曰江西敗竄餘匪占踞安慶欲圖牽掣金陵大兵前已飭湖廣江西速備船礮下駛援應並諭江忠源跟蹤追勦九月初三日東關失守是該逆進則窺伺巢廬退可接應安慶賊勢愈張兵力不足著周天爵遵照前旨迅撥兵勇前往堵剿保護廬巢杜賊北竄之路呂賢基所帶練勇既可援應廬郡仍須設法阻截安慶賊匪

令不得與東關聯貫常清所帶青州官兵現到和州
卽著傳旨該副都統協力攻勦該撫一面嚴督在城
文武紳士固守廬州一面知會河南山東豫防賊匪
分竄並著周天爵李嘉端督率玉山恆興力籌堵禦
勿令舍舟登陸復行北竄

上又命軍機大臣傳諭張亮基崇綸曰現在江甯揚鎮
三城均未收復若任該逆由廬郡一帶併力北竄更

難收拾張亮基等前已委員估買江船改造戰船此時想已挑選兵勇配齊礮位著卽迅委妥員管帶駛往安徽交江忠源管帶以資攻剿

上又命軍機大臣傳諭江忠源曰現在安慶已被賊踞復有賊船數百闖入裕溪情形緊急該臬司行抵何處江西所帶船隻共有若干是否足敷應用著先會同李嘉端設法水陸防剿使該匪不致擾及廬州俟

湖北船礮兵勇到時即可進援安慶力保皖疆萬勿再令賊匪北竄

十一日癸丑勝保奏言逆衆盤踞橐城臣初六日

甫至正定因經文岱維祿俱已趕到當派員弁星夜馳往督隊經文岱等帶領

盛京吉林馬蘭各營兵七百餘名正擬會同西凌阿進攻探得該逆在北關外搭造浮橋意圖北

渡經文岱卽率領官兵直奔棗城維時逆匪渡
河方半城中尙餘賊二三千我兵雖爲數無多
勇氣百倍擁入城中當卽斃賊二百數十名逆
衆披靡全向北關外逃竄我兵追至河沿殺賊
無數其已過河北之賊見我兵追殺甚急卽將
浮橋放火落水死者甚多該逆逃過河北整隊
排列用大礮向南岸轟擊又慮官兵乘夜搭橋

渡河全股竄往河北村中臣於初七日由正定督兵前進距藁城十餘里探知逆匪在郝莊盤踞聞臣已渡滹沱督兵前進卽乘夜遁向晉州當令西凌阿等跟蹤速追臣亦督兵繼至適准桂良飛咨賊有分股竄擾定州所屬李青果村之信臣權量輕重本擬卽速東勦因已折而東北趨赴定州該逆知大兵趕到仍合股東竄晉

州現在西陵阿等尾追臣復咨催培成多爾濟
那木凱達洪阿等由高陽深澤迎擊不致任其
猖獗臣亦卽督兵先行馳赴保定再由高陽一
帶督勦前進並飛催蘊秀郝光甲等帶兵馳赴
冀州衡水一帶以扼其東南竄逸之路趙北口
最關緊要經臣咨催慶祺帶兵前往未知能否
趕到恩華業已星夜趕來臣等會合商辦一切

總期合力殄滅此賊以慰

宸廑奏入

上命軍機大臣傳諭勝保曰橐城賊匪現已逃向晉州
河間天津一帶甚屬空虛本日已諭令僧格林沁派
令培成多爾濟那木凱達洪阿等將所帶京兵及察
哈爾官兵迅催前進由高陽深澤一路迎擊惟培成
等甫經出京道途紆折恐一時未能趕到且諸將中

惟達洪阿曾經出兵其餘俱未經行陣仍著勝保迅
派得力將弁帶兵前往扼要堵截慶祺帶領盛京官
兵遏賊東竄天津之路並著該大臣酌量調度僧格
林沁所帶官兵四千餘名均在涿州一帶布置兼顧
保定易州等處其河閒天津等處何路緊要卽著撥
兵迅速進剿並隨時知照僧格林沁等酌度緩急相
機夾擊訥爾經額原帶之兵前已有旨飭令歸西渡

阿管帶著勝保迅卽飛調來營以資攻剿

上又命軍機大臣傳諭僧格林沁培成多爾濟那木凱達洪阿曰臺城賊匪現已逃往晉州勝保由定州至保定督兵進剿並派令西凌阿等跟蹤追擊復咨催培成等帶領京兵及察哈爾官兵由高陽深澤一帶迎擊著僧格林沁卽催令培成多爾濟那木凱達洪阿等先將已到之兵卽刻管帶前進探明賊蹤與勝

保等知會合力夾擊毋令逃竄

上又命軍機大臣傳諭桂良曰此時逆匪被創逃竄不難設法殄擒惟保定既有準備恐賊匪東竄河閒天津等處不可不迅速截剿已諭知僧格林沁勝保將培成多爾濟那木凱達洪阿等所帶官兵催赴迎擊該督卽知照慶祺將所帶之兵扼要會剿並確速偵探賊蹤毋稍延誤

同日

上諭內閣曰著添派都察院左都御史步軍統領聯順辦理巡防事宜

十二日

甲寅

勝保奏言據探逆匪又欲由晉州回

竄安平祁州蠡縣一帶臣先在清風鎮急爲布

置卽日前赴保定向南擊剿較有把握並派將

軍善祿由祁州帶兵前進臣亦卽督兵馳往夾

擊並吞催慶祺防勦河間北路培成多爾濟那
木凱由東北蠡縣速進會勦達洪阿卽由保定
馳進先與臣會合再酌量緩急分撥協勦復嚴
催副都統綿洵總兵桂齡由正定渡河馳由無
極深澤一帶進擊扼其由西南回竄之路又飛
催郝光甲蘊秀由滹沱以南馳赴冀州衡水扼
賊南竄一面飛咨天津鹽政收集船隻以免賊

匪偷渡臣卽督兵飛速前進保衛畿疆相機督
兵進剿

勝保又奏言查逆匪竄入晉州臣本已跟蹤追
剿因桂良飛咨賊擾定州境內是以改由東北
馳赴定州迎剿及至定州知逆賊並未擾及而
祁州安平所屬境內探聞有逆賊盤踞馬店一
帶村莊臣當商派善祿帶兵馳赴祁州迎擊臣

亦擬再探確實督兵前進頃又據直隸藩司等
詳稱賊於初八日攻陷深州請卽派兵往援等
語查賊擾晉州亦係初八日陷城後卽盤踞衛
牌等村鎮何以是日又陷深州其爲逆賊分股
無疑蠡縣告急恐仍由晉州竄往查蠡縣距省
僅百餘里臣惟有在保定居中調度繞出賊前
向東南迎擊方可得手兼可保衛畿疆查此股

逆賊勢甚剽悍不能保其不竄東南雖有西渡
阿等追勦之兵未必能全行撓住是以必須各
路兵到相機齊進達洪阿之兵尙多副都統綿
洵總兵桂齡郝光甲侍衛蘊秀等皆距臣不遠
已分撥由東南西南進勦並派員持令前往正
定迎提未到官兵分赴所撥各路迅速截擊飛
催慶祺培成多爾濟那木凱分路速進以資會

勦惟托明阿因在澤州一帶養傷未能趕到恩
華現又獲咎幫辦無人可否仰懇

皇上簡員幫辦軍務俾臣藉資贊助之處伏祈

訓示遵行

勝保又奏言恩華現已趕到當遵

旨派員解京惟該員才識疏淺未能豫防似非有心貽
誤可否責令帶罪自效抑仍應治罪之處伏候

聖裁奏入

上命軍機大臣傳諭勝保桂良曰逆匪奔突無定若分股滋擾又恐牽掣我師本日已諭令僧格林沁統兵前赴保定駐紮既可保衛京畿又可爲前路聲援復令培成多爾濟那木凱達洪阿等刻卽前進其應由何路進剿之處著該大臣隨時知照西南兩路固應防備而東路河間天津一帶尤關緊要綿洵桂齡郝

光甲蘊秀等究竟在何處耽延著卽嚴催星速前進
毋得再有延誤慶祺現在行抵何處著勝保酌量調
撥僧格林沁旣駐紮保定北路一帶可資捍禦勝保
等惟有併力進剿迅殄醜類現在江西匪船下竄安
徽廬州一帶勢甚危急若不早殄此賊儻皖省匪徒
北竄更恐滋蔓難圖保定防守一切事宜卽責成桂
良嚴密布置並與僧格林沁商酌辦理訥爾經額前

由天津運赴清化鎮礮位現在是否帶至軍營著查
明酌調應用

上又命軍機大臣傳諭僧格林沁曰現在逆賊分股攻
陷深州蠡縣告急著僧格林沁卽日帶兵馳赴保定
以防逆賊北竄並可防備東西兩路以便勝保專力
進攻並著飛催培成多爾濟那木凱達洪阿等卽行
管帶現到官兵迅速前進知照勝保應由何路接應

卽行調撥毋稍延誤

上諭內閣曰綏遠城將軍善祿察哈爾都統西凌阿均著在勝保軍營幫辦軍務

上又諭內閣曰勝保奏恩華現已趕到可否責令帶罪自效等語恩華著暫緩解京准其留於勝保軍營帶罪圖功以觀後效

同日李嘉端奏言逆匪竄過東關已革臬司張

印塘督兵進剿受傷而退巢縣力難支持勢必直撲郡城若不迅速迎剿誠恐滋蔓難圖惟離城四十里之店埠爲巢縣至合肥必由之路且係南北往來驛站其閒團練人數尙多必得臣督兵親往激勸庶可力禦賊鋒其水路已派知縣張埴訓導朱宗采前赴沿河一帶勸諭團練相機堵禦一有警報臣仍前督師往剿往來策

應若賊竟水陸同時竄至驟難兼顧臨時或令
藩司劉裕鈐於附近河道催集鄉勇團練使兩
地互爲聲援至桐舒毗連安慶扼守尤爲緊要
當飛咨恆興仍駐兵該處防其暗中勾結庶無
牽掣之患

李嘉端又奏言據王正誼自含山函稱初三日
寅刻賊由黃落河水陸並進當經玉山派令黃

元吉由攔鼓山武舉楊國慶由王淮渡兩路進
剿而自帶壽春廣東兵五百名嚴守東關其陸
路之賊一由攔鼓山腳八里外登岸循山麓撲
來黃元吉督勇前進抵禦不期攔鼓山後連龜
山之陰突出數股黃元吉等腹背受敵死傷極
多一時大潰其水路賊船經玉山督兵極力相
持賊勢幾敗而龜山之側忽又有匪船數隻由

西渡東我兵久戰疲憊潰去大半祇存四百餘人王正誼督勇應援亦不得力遂與玉山退至含山一面飛咨琦善向榮分兵救援廬郡並擬招集餘勇赴柘皋等處相機截擊等情查巢縣西濱巢湖水道固易竄入其城北黃山前後路徑雜出皆可直達臨淮巢城如果失守恐賊將由水陸分竄口隘甚多非數百人所能兼顧請

旨飭令慧成迅帶重兵由滁州全椒一路前進併力堵
剿俾臣可專扼廬州一面不致顧此失彼奏入

上命軍機大臣傳諭李嘉端呂賢基玉山曰現在巢縣
情形十分緊要所有水陸各口隘著李嘉端盡力扼
守廬州重地尤爲喫緊務當設法保衛該撫出城駐
紮店埠據稱團練人數尙多著卽妥爲勸諭激勵以
助兵力呂賢基袁甲三趙昀等所辦團練想有成效

亦可藉資捍衛總兵玉山勦賊是其專責豈容遇賊輒退著卽嚴飭相機奮力堵截毋任逆匪北竄

上又命軍機大臣傳諭周天爵曰前因賊匪占踞安慶竄入裕溪已諭令周天爵派撥兵勇前往堵禦現在廬州情形危急若廬郡稍有疏失大股賊匪復將北竄勢更滋蔓難圖皖江爲南北咽喉周天爵懇直勇敢朕所素知當此軍情緊急地方待援甚迫豈不能

爲朕分憂耶。賊紆青所募壯勇亦可自成一隊用以擊賊。現在山西餘匪竄入直隸勝保等統兵截擊不暇。南顧該侍郎能保衛皖省杜其北竄之路。朕所望也。

上又命軍機大臣傳諭琦善陳金綬雷以誠慧成福濟曰。據李嘉端奏。巢縣力難支持。賊必直撲廬郡。該撫現駐店埠。督兵進剿。惟水陸口隘甚多。勢難兼顧。請

飭慧成迅統重兵由滁州全椒一路會剿等語現在
安慶已被賊踞儲廬郡更被肆擾則揚州大軍亦恐
孤立常清所帶青州官兵八百餘名計已早到和州
而該處兵勇較單仍恐未能得力著該大臣等迅速
添派弁兵前往安徽會同剿擊若頓兵揚城任賊由
皖省北竄該大臣等自問安乎否耶

上又命軍機大臣傳諭江忠源曰現在安慶已被賊踞

饒巢縣合肥一帶再令該匪竄至勢更蔓延不可收
 拾已諭令李嘉端周天爵等妥籌布置相機勦辦惟
 兵力甚單不敷分撥情形十分危急著江忠源迅卽
 馳赴皖省無論水陸總以力遏賊衝杜其北竄爲要
 都司戴文蘭李輔朝等是否已由九江乘船下駛著
 一併飛催前進攻復安慶援應廬州毋稍遲誤